

COMUNICATO n. 863 del 19/04/2024

Traduzione in ladino

Fon Euregio per la ennescida, aproèda la cordanza per 1,3 milions de euro

[Ladino] Aproà da la Jonta provinzièla, aldò de la proponeta del Assessor al svilup economich, lurier, università, ennescida, l schem de cordanza de colaborazion anter l GECT Euregio Tirol – Sudtirolo – Trentin, la Provincia autonoma de Trent, la Provincia autonoma de Busan e l Land Tirol per la cooperazion di trei teritories en cont del 5° avis del Fon Euregio per la ennescida (ESF).

Per l assessor la promozion, la crescimonia e l sparpagnament de la ennescida e de l'inovazion i é strumenc fontamentèi per l svilup, tant del capital uman che del sistem de la firmes. De fat vegn tout ite la calità e la competitività de dut l teritorie provinzièl. Per chest la Provincia la se met dant de a renforzèr la posizion internazionèla del Trentin tel setor de la ennescida e de l'inovazion ence tras la scomenzadives del Euregio.

L provediment l vèrda l jir inant co la ativitàdes finanzièdes tras l GECT Euregio tel ciamp de la ennescida de basa; apontin anchecondi l é stat finanzià tel chèder del ESF cater avisc, che i à dat l met de meter a jir 23 projec inter-regionèi per zirca 8,5 milions de euro en dut.

I projec ametui a finanziament per i trei egn 2025/2027 i podarà se emprevaler de 1,3 milions de euro metui a la leta da noscia Provincia a scomenzèr dal an che vegn, descheche sottrissà dal president de la Provincia autonoma de Trent.

L GECT Euregio l à anter si obietives ence la promozion e l renforzament de la attività coordinèda de ennescida scientifica, tras scomenzadives che tol ite ennescidores de duc e trei i teritories del Euregio, donca Tirol, Sudtirolo e Trentin. Per chesta rejon presciapèch aca 10 egn la Jonta del GECT l'aea deliberà de meter su l ESF (Euregio Science Fund), che vel portèr dant projec inter-regionèi de nivel internazionèl tel ciamp de la ennescida de basa, te setores de enteres spartii da dut l raion. Per chest vegn pervedù la sottoscrizion de na Cordanza de colaborazion anter l GECT medemo e i goergn di trei teritories en cont di avisc e di terminis. Col provediment de anché, donca, vegn aproà l schem de chesta Cordanza de colaborazion e ge vegn dat l'autorisazion al President de la Provincia de sottoscriver la cordanza medema, estra che meter a la leta sul bilanz provinzièl la ressorses debeseegn per finanzièr chisc projec.

L coordinament de la cabina de regia e di doeres coleé al quinto avis del ESF l ge vegn dat su te na pruma fasa al Land Tirol e demò per la fasa de valutazion de la proponetes de projet ence col sostegn del Fon austriach per la scienza (FWF), attività per chela che l provediment de anché l à metù a la leta a favor del GECT Euregio na quota pèrt a cèria de vigni teritorie de 86.666,67 euro.

Autra informazions les é a la leta sul sit:

<https://www.fwf.ac.at/en/funding/portfolio/international-collaborations/tyrol-south-tyrol-trentino>

Traduzion di Servijes Linguistics e Culturèi del Comun general de Fascia

(cdt)